

四庫全書

史部

欽定四庫全書

欽定外藩蒙古回部王公表傳卷之六十四

傳第四十八

扎薩克多羅貝勒卓特巴列傳

今襲鎮國公

卓特巴喀爾喀部人姓博爾濟吉特扎薩克圖汗格埒克延丕勒族祖父烏巴岱為賚瑚爾汗次子號達爾瑪什哩琿台吉子二長即卓特巴襲達爾瑪什哩號次諾木齊子額爾德尼衮布授扎薩克

台吉別有傳康熙十四年卓特巴遣使入貢二十一年

命前鋒叅領扎木素等往賚冠服佩帶弓刀器幣二十五年以扎薩克圖汗成袞與土謝圖汗察琿多爾濟構釁

諭卓特巴導之修好二十六年成袞子沙喇謀糾噶爾丹攻察琿多爾濟卓特巴偕同族台吉德克德赫與其謀從沙喇迎噶爾丹尋為察琿多爾濟所追德

克德赫被殺卓特巴遁二十九年偕沙喇子巴朗
率屬來歸授扎薩克

賜居歸化城同族台吉喇布坦納木扎勒鄂齊爾冰圖岱
青等相繼降

命轄之

賜粟賑所屬貧戶三十年四月

駕幸多倫諾爾卓特巴弗至有遵義台吉朋素克者額爾
德尼袞布從子也嗣父阿海岱青為所部扎薩克

時以疾卒卓特巴率台吉桑噶斯轄布掠其牧額
爾德尼衮布懇諸

朝

詔奪扎薩克職九月服罪來朝

詔封多羅貝勒仍授扎薩克尋以乏食

賜粟賑之三十二年卒子二長薩穆多爾濟襲貝勒次喇

布坦襲扎薩克台吉別有傳

一次襲薩穆多爾濟卓特巴長子康熙三十一年

襲扎薩克多羅貝勒三十五年卒子諾爾布班第襲

二次襲諾爾布班第薩穆多爾濟長子康熙三十五年襲扎薩克多羅貝勒尋

賜牧塔爾弼克哩葉庫布帖爾四十年

賜黃馬褂杏黃轡五十九年隨振武將軍傅爾丹由布魯

勒進勒準噶爾至格爾額爾格擒宰桑貝坤等百餘人焚其糧於烏蘭呼濟爾軍旋赴汗庫奎烏伯

爾賽堪呼拉濟駐防雍正十二年以縱屬奪軍糧
議罪

詔降扎薩克鎮國公尋卒子齊巴克扎布先卒孫旺扎勒
襲

三次襲旺扎勒諾爾布班第孫雍正十二年襲扎
薩克鎮國公十三年由哈魯納解牲畜納科布多
軍營乾隆十七年卒子瑪哈巴拉襲

四次襲瑪哈巴拉旺扎勒長子乾隆十七年襲扎

薩克鎮國公三十六年扈

駕木蘭行圍

賜孔雀翎四十六年

諭曰瑪哈巴拉所襲鎮國公係其祖諾爾布班第獲罪
降襲之爵著恩予世襲罔替

扎薩克固山貝子博貝列傳

今襲輔國公

博貝喀爾喀部人姓博爾濟吉特扎薩克圖汗格
埒克延丕勒從叔父祖策哩斯奇布賽因阿海為

車臣濟農崆奎次子生巴喇斯騰額哩陀音號
察罕巴爾子二長即博貝仍父號次班第號阿海
岱青駐牧唐努烏斯山界康熙二十七年博貝率屬
來歸

命游牧烏喇特界內庫呼謨多二十八年授扎薩克

遣官頒示法度俾輯所屬失業者二十九年來朝先是博
貝奉貢至奏喀爾喀習尚隳必敗亡彼時臣必來
歸至是

上憶前奏嘉其先見

賜賚甚厚三十年迎

覲多倫諾爾

詔封固山貝子仍兼扎薩克初博貝弟班第為厄魯特羅卜藏額琳沁罕篤所掠奔青海有達賴巴圖爾者青海和碩特族也遣歸喀爾喀留其孥百餘育之至是班第具疏自陳

上因喇嘛商南多爾濟奉使青海

命攜歸使完聚四十二年博貝卒子烏巴什降襲鎮國公
一次襲烏巴什博貝長子康熙四十二年襲扎薩
克鎮國公雍正二年以縱厄魯特叛賊車木伯勒
議罪削爵

命其弟旺舒克襲

二次襲旺舒克博貝次子雍正二年襲扎薩克鎮
國公十年以同部輔國公通謨克游牧被準噶爾
掠

詔察閱旺舒克及扎薩克輔國公噶勒桑色旺鄂木布濟等游牧均給糧茶乾隆三十一年以病罷子拉旺多爾濟降襲輔國公

三次襲拉旺多爾濟旺舒克長子乾隆三十一年襲扎薩克輔國公四十六年

諭曰拉旺多爾濟所襲輔國公係由初封貝子降等承襲著加恩世襲罔替

扎薩克輔國公索諾木伊斯扎布列傳

索諾木伊斯扎布喀爾喀部人姓博爾濟吉特郡王朋素克喇布坦從弟祖策璘楚琥爾為車臣濟農崆奎長子生子多爾濟仍車臣濟農號子一即索諾木伊斯扎布喀爾喀舊俗汗最貴濟農次之諾顏又次之多爾濟以與扎薩克圖汗成袞隙失濟農號代之者為額爾德尼濟農薩瑪第即朋素克喇布坦父康熙二十七年索諾木伊斯扎布率屬由和碩託輝來歸

命居歸化城三十年迎

覲多倫諾爾與朋素克喇布坦爭濟農

詔除濟農舊號授索諾木伊斯扎布扎薩克一等台吉有
格寧者號伊勒登和碩齊其弟也避噶爾丹徙居
青海至是率戶百餘來歸乞與索諾木伊斯扎布
同居

詔令完聚是年冬來朝三十五年隨大將軍費揚古擊
噶爾丹於昭莫多敗之噶爾丹遁請隨侍衛阿南

達沿途追緝

允之三十六年偕弟格寧分駐布隆吉爾巴里坤噶斯等

處噶爾丹竄斃敘功

詔封輔國公

賜牧伊克敖拉克察罕郭勒五十六年卒子噶勒桑色

旺襲

一次襲噶勒桑色旺索諾木伊斯扎布長子康熙

五十七年襲扎薩克輔國公雍正十年以同部輔

國公通謨克游牧被掠

詔均頒給糧茶乾隆二年卒子旌準多爾濟襲

二次襲旌準多爾濟噶勒桑色旺長子乾隆二年

襲扎薩克輔國公二十三年卒子拉沁蘇隴襲

三次襲拉沁蘇隴旌準多爾濟長子乾隆二十三

年襲扎薩克輔國公四十六年

諭曰拉沁蘇隴所襲扎薩克輔國公爵係其祖索諾木

伊斯扎布効力軍營所封著加恩世襲罔替

扎薩克輔國公衮占列傳

衮占喀爾喀部人姓博爾濟吉特扎薩克郡王朋素克喇布坦從叔父祖賽因巴特瑪號哈坦巴圖爾居額爾濟根子車稜衮布嗣哈坦巴圖爾號有子二長即衮占號額爾德尼哈坦巴圖爾次諾爾布愷號額爾德尼岱青康熙二十七年噶爾丹掠喀爾喀抵杭愛山衮占以兵拒之為所敗攜衆來歸

命游牧茂明安界外蘇默爾格爾二十八年授扎薩克
遣官頒示法度俾輯所屬失業者三十年迎

覲多倫諾爾

詔授一等台吉仍兼扎薩克三十一年

詔發粟賑所屬貧戶有伊拉古克三呼圖克圖者奉使諭
噶爾丹至則叛降隨噶爾丹掠烏珠穆沁克什克
騰諸部界大軍敗之於烏蘭布通伊拉古克三呼
圖克圖潛遣黨入邊伺釁聚占縛以獻

詔獎之三十五年夏隨大將軍費揚古擊噶爾丹於昭莫
多大敗之冬

上幸歸化城衮占自軍營來朝

賜牧杭愛山陰之額爾德齊老圖五十年來朝請駐邊巡
哨

諭曰爾自來歸以來奮勉効力屢著勤勞行走甚屬敬慎
今業已年高於爾部中為尊行肫誠盡力至老不衰朕
甚念之著加恩封爾為輔國公以示優眷五十二年卒

子二長伊達木扎布授扎薩克台吉別有傳次敏珠爾襲輔國公

一次襲敏珠爾衮占次子康熙五十二年襲扎薩克輔國公五十四年散秩大臣祁里德赴推河防禦準噶爾

上念敏珠爾遠居邊勢稍弱

詔給軍符令有警輒馳報仍下廷臣議駐防策尋議令祁里德會喀爾喀衆扎薩克於敏珠爾所居額德爾

齊老圖附近額克阿喇勒科布多烏蘭固木各擇
適中地有水草可耕者移兵屯駐以壯聲援兼護
敏珠爾游牧

詔如議雍正九年

命內徙游牧乾隆二年授所部副將軍叅贊五年

諭由多倫諾爾送哲卜尊丹巴呼圖克圖歸居庫倫會
敏珠爾以屬台吉特克什等牧產損各扎薩克助
之卒不給請毋越綽克圖視可漁獵地暫外徙額

駙親王策凌代奏

上以準噶爾議界未定弗許是年敏珠爾卒子策魯布襲

二次襲策魯布敏珠爾長子乾隆五年襲扎薩克輔國公九年卒無嗣弟多岳特多爾濟襲

三次襲多岳特多爾濟敏珠爾第三子乾隆九年襲扎薩克輔國公二十一年卒無嗣弟敏丕木多爾濟襲

四次襲敏丕木多爾濟敏珠爾第四子乾隆二十一年襲扎薩克輔國公三十七年扈

駕木蘭行圍

賜孔雀翎四十一年護哲卜尊丹巴呼圖克圖赴西藏四十四年赴汗哈屯察罕烏蘇巡邊四十六年

諭曰敏丕木多爾濟所襲扎薩克輔國公係其祖衮占軍營奮勉所封著加恩世襲罔替是年卒子齊旺達什襲

原書葉次誤號

五次襲齊旺達什敏丕木多爾濟長子乾隆四十
六年襲扎薩克輔國公

欽定外藩蒙古回部王公表傳卷之六十四

欽定四庫全書

欽定外藩蒙古回部王公表傳卷之六十五

傳第四十九

扎薩克輔國公通謨克列傳

通謨克喀爾喀部人姓博爾濟吉特扎薩克圖汗
格埒克延丕勒族叔父其高祖青達瑪尼默濟克
號車臣諾顏子二長唐古特墨爾根岱青次多爾
濟阿喇布坦伊勒登唐古特墨爾根岱青子本塔

爾岱青巴圖爾有子二長墨德卓哩克圖即通謨
克父次徹埒克追封輔國公次巴克蘇木孫普爾
普車稜授扎薩克台吉別有傳多爾濟阿喇布坦
伊勒登子訥克額爾德尼阿海生達什敦多布授
扎薩克台吉居青海見青海厄魯特部總傳初噶
爾丹掠所部墨德卓哩克圖族潰奔青海康熙四
十三年乞還牧喀爾喀

許之

詔授一等台吉

賜牧阿爾台額爾齊斯烏龍貴界五十三年卒子通謨克

嗣一等台吉

詔授扎薩克以所居近烏梁海

命轄之五十六年大軍由阿爾台進勦準噶爾通謨克隨

前鋒統領定壽先往擊之

賜諭嘉獎時策旺阿喇布坦游牧博囉塔拉以額琳哈畢

爾噶為要隘通謨克居邊久悉賊勢虛實

上知其能

詔隨土謝圖汗部貝勒丹津多爾濟赴巴里坤援勦雍正
二年青海逆賊羅卜藏丹津叛通謨克隨副將軍
阿喇納駐布隆吉爾偵賊黨阿喇布坦蘇巴泰等
據喀喇諾爾路肆掠偕總兵孫繼宗往捕至推默
爾賊敗遁復偕副都統阿玉什追縛其黨丹津以
獻

詔嘉之晉封輔國公八年靖邊大將軍傅爾丹以通謨克

游牧逼阿濟畢濟慮為準噶爾所侵奏遣前鋒統領定壽副都統瑪爾齊喇錫等由庫卜克爾屯兵伊克斯諾爾通謨克偕所部郡王格埒克延丕勒督兵千駐塔爾弼阿嚕誥互為聲援九年賊酋大策凌敦多卜等偵我師還駐科布多由阿濟掠通謨克牧其屬多潰析

上憫之

諭總督查郎阿察置務令得所復

遣官慰諭十年

詔移其衆於阿拉善頒糧茶給之查郎阿奏通謨克屬業
盡失無食居請增給口糧理藩院議遣員攜帑二
萬往賞並給一年口糧

詔如議速行乾隆四年通謨克卒子旺沁扎布襲

一次襲旺沁扎布通謨克長子乾隆四年襲扎薩
克輔國公二十四年授副盟長四十六年

諭曰旺沁扎布所襲輔國公乃其父通謨克軍營奮勉

有功所封著加恩世襲罔替

附 追封輔國公徹埒克列傳

徹埒克輔國公通謨克叔父初授一等台吉隸扎薩克圖汗策旺扎布旗雍正十年準噶爾賊酋小策凌敦多卜等由奇蘭襲阿爾台徹埒克選騎四十餘與子彌什克迎擊之賊益衆攻徹埒克力戰死靖邊大將軍順承親王錫保以

聞

詔追封輔國公改附通謨克旗令其子彌什克襲

特命世襲罔替

一次襲彌什克徹埒克長子雍正十年七月隨父
擊準噶爾被擒尋脫歸襲輔國公十月以駐張家
口外之察哈爾蒙古積六百餘丁

賜彌什克七十令轄之乾隆十八年杜爾伯特台吉車凌
等來降彌什克偕賽因諾顏部貝子車木楚克扎
布以兵三百赴巴顏珠爾克及博托和泥溝禦準

噶爾追賊會扎哈沁宰桑禡木特追至擅八汎

飭偕副都統達青阿率兵千餘捕之弗獲十九年誘擒

禡木特

傳旨訓飭二十年隨大軍勦達瓦齊於伊犁軍還駐烏

哈爾和碩防護烏梁海尋

命督理驛務二十二年署定邊左副將軍郡王車布登

扎布奏彌什克老成練事請遣護杜爾伯特游牧

從之二十九年卒子貢楚克扎布襲

二次襲貢楚克扎布彌什克長子乾隆二十九年襲輔國公四十年卒子索諾木車稜襲

三次襲索諾木車稜貢楚克扎布長子乾隆四十年襲輔國公四十六年

詔世襲罔替如故

扎薩克輔國公沙克扎列傳

沙克扎喀爾喀部人姓博爾濟吉特貝勒博貝弟初陷準噶爾後乘間歸授二等台吉康熙五十四

年隨博貝招降烏梁海人和羅爾邁五十六年隨
勦厄魯特宰桑羅卜藏錫喇布皆有功雍正二年
詔封扎薩克輔國公仍留軍効力乾隆二年以病罷子多

爾濟車登襲

一次襲多爾濟車登沙克扎長子乾隆二年襲扎
薩克輔國公二十年隨大軍勦達瓦齊師旋阿睦
爾撒納叛多爾濟車登被執不屈歸有達瓦藏布
者阿睦爾撒納族也邀於路被執之去或言已降

賊

命削爵嚴緝治罪二十一年七月定邊左副將軍哈達
哈追勦阿睦爾撒納擒達瓦藏布多爾濟車登始
脫歸

諭曰去歲伊犁復叛多爾濟車登力弱被擒賊退後他
人俱已全歸伊獨弗至朕意其或順從阿逆苟且偷
生不獨深負國恩實為衆喀爾喀之辱是以令嚴緝
治罪今覽哈達哈奏始知其被賊拘留備經勞瘁甚

屬可憫著加恩復其公爵即隨哈達哈進征哈薩克
會和託輝特逆賊青衮咱卜叛

詔大軍往勦以多爾濟車登係和託輝特族慮疑懼

諭馳赴軍協勦十月定邊左副將軍親王成衮扎布奏

多爾濟車登孥與逆賊同居應令由軍營速歸牧

示所屬毋惑從之十二月青衮咱卜就擒籍其屬

命多爾濟車登分轄之

賜雙眼孔雀翎二十二年授所部副將軍叅贊二十三

年

諭偕叅贊大臣福祿緝烏梁海劫賊布爾古特布格等

擒之

獎賚幣二十九年卒子車都布多爾濟襲

二次襲車都布多爾濟多爾濟車登長子乾隆二十九年襲扎薩克輔國公四十六年

詔世襲罔替

追封輔國公齊巴克扎布列傳

後授扎薩克

齊巴克扎布喀爾喀部人姓博爾濟吉特貝勒博
貝從孫祖羅卜藏達什以協理台吉隨博貝招降
烏梁海人和羅爾邁有功

賜孔雀翎子烏巴錫生子一即齊巴克扎布初授二等
台吉乾隆二十年隨大軍勦達瓦齊抵塔本集賽
杜爾伯特叛賊巴朗就擒齊巴克扎布偕宰桑烏
勒木濟械送

京師

賜孔雀翎尋赴烏里雅蘇台聽調二十一年輝特逆賊
普爾普德濟特等由固都爾格叛逃齊巴克扎布
追擒之復隨叅贊大臣納穆扎爾捕烏梁海逃衆
至阿哩固特賊逸尾擊之陣歿事

聞

諭曰齊巴克扎布致命行陣深堪嘉憫著追封輔國公
賜銀三百兩治喪其子巴圖濟爾噶勒襲爵並授扎
薩克尋視一品大臣例

賜祭葬入祀昭忠祠

一次襲巴圖濟爾噶勒齊巴克扎布長子乾隆二十二年襲輔國公授扎薩克四十六年

諭曰巴圖濟爾噶勒所襲扎薩克輔國公係因其父齊巴克扎布軍營効力被傷陣歿所封著加恩世襲罔替

公品級扎薩克一等台吉喇布坦列傳

今襲鎮國公

喇布坦喀爾喀部人姓博爾濟吉特貝勒卓特巴

次子初授閒散台吉隸兄子貝勒諾爾布班第旗
康熙五十六年隨大軍由布魯勒路進剿策旺阿
喇布坦五十九年復由布拉罕路襲擊皆有功雍
正五年隨額駙郡王策凌與俄羅斯使薩瓦立石
定界六年策凌疏薦其才請別為扎薩克

許之

詔授一等台吉

賜牧奇吉爾蘇台界十年策凌等統大軍追擊準噶爾順

承親王錫保檄扎薩克圖汗部兵萬赴烏遜珠勒
援勦喇布坦弗至私歸游牧

詔削職十三年扎薩克圖汗格埒克延丕勒奏喇布坦曾
再從征又輓米捐羊厯著績罷斥後深自愧懼奮
力軍營請

恩予開復

詔授原職乾隆二十一年和託輝特逆賊青衮咱卜叛衆
喀爾喀為所煽多棄汛歸喇布坦不之附事

聞

諭曰喇布坦年雖已老行走甚屬奮勉著賜公品級以示獎勵
朗衮扎布者喇布坦子也以協理台吉從征達瓦齊及哈薩克敘功授一等台吉

賜孔雀翎二十三年靖逆將軍雅爾哈善勦庫車逆回
朗衮扎布偕台吉額琳沁率兵八百繼進由巴掄沙扎爾至積噶托果納擊賊援斬獲甚衆

諭嘉之封輔國公尋克庫車朗衮扎布邀擊逃賊無脫

者復隨定邊將軍兆惠進師葉爾羌至呼爾璦擊賊敗之

詔晉封鎮國公

賜雙眼孔雀翎二十六年

賜凱軍宴朗袞扎布留駐軍營

頒賜銀幣二十八年以展汎界偕烏梁海內大臣察達克由巴顏珠爾克至烏拉克沁伯勒齊爾及烏嚕木齊路定十五汎俱相隔百里為率

欽定四庫全書

御定外藩圖志卷六十五

十一

詔如議尋扈

駕木蘭行圍

賜黃馬褂

命乾清門行走三十一年喇布坦以老罷時朗衮扎布
卒孫索諾木多爾濟襲

一次襲索諾木多爾濟喇布坦孫鎮國公朗衮扎
布乾隆三十一年襲公品級扎薩克一等台吉尋
襲鎮國公四十六年

諭曰索諾木多爾濟所襲扎薩克鎮國公爵係其祖父
効力軍營所封著恩予世襲罔替

欽定外藩蒙古回部王公表傳卷之六十五

欽定四庫全書

欽定外藩蒙古回部王公表傳卷之六十六

傳第五十

扎薩克一等台吉額爾德尼衮布列傳

額爾德尼衮布喀爾喀部人姓博爾濟吉特貝勒
卓特巴從子父諾木齊號阿海台吉子五長額爾
克次即額爾德尼衮布次阿海岱青次羅卜藏車
稜次納木扎勒康熙元年扎薩克圖汗旺舒克為

羅卜藏台吉額琳沁所戕阿海岱青會土謝圖汗
察琿多爾濟兵擊走額琳沁九年請於

朝以旺舒克弟成袞嗣稱汗遣使貢駝馬

詔嘉之授扎薩克代額琳沁貢九白十七年阿海岱青卒

子朋素克嗣扎薩克

賜遵義台吉號及印二十年遣使貢二十一年

命內大臣烏默訥等往賚冠服佩帶弓刀器幣二十五年
諭導其汗成袞與察琿多爾濟釋怨修好三十年朋素克

卒額爾德尼袞布迎

覲多倫諾爾

詔授扎薩克一等台吉以所屬乏食

賜粟賑之時卓特巴以朋素克嗣絕掠其牧產額爾德尼

袞布因愬狀

諭卓特巴歸所掠十二月額爾德尼袞布來朝

優賚之三十六年

賜牧扎布堪河三十八年卒子垂扎布襲

一次襲垂扎布額爾德尼袞布長子康熙三十八年襲扎薩克一等台吉雍正三年卒子丹津襲二次襲丹津垂扎布長子雍正三年襲扎薩克一等台吉八年卒子格埒克襲

三次襲格埒克丹津次子雍正八年襲扎薩克一等台吉十年以縱屬奪軍糧罪削職

命其兄羅卜藏喇布坦襲

四次襲羅卜藏喇布坦丹津長子雍正十二年襲

扎薩克一等台吉乾隆二十二年以病罷子莽蘇
爾襲

五次襲莽蘇爾羅卜藏喇布坦長子乾隆二十二
年襲扎薩克一等台吉四十六年

詔世襲罔替

扎薩克一等台吉烏爾占列傳

烏爾占喀爾喀部人姓博爾濟吉特扎薩克圖汗
格埒克延丕勒從祖父察罕斯奇布號車臣諾顏

為車臣濟農崆奎第五子烏爾占嗣車臣號駐牧
固爾班賽堪康熙二十七年率屬來歸

命游牧茂明安界外蘇默圖格爾二十八年授扎薩克
遣官頒示法度俾輯所屬失業者三十年迎

覲多倫諾爾

詔授一等台吉仍兼扎薩克三十一年

詔發粟賑所屬貧戶三十四年遣使陳噶爾丹肆掠狀三
十五年隨大將軍費揚古擊噶爾丹於昭莫多三

十六年奏遣協理台吉顧木濟布赴費揚古軍効
力

許之尋噶爾丹竄死朔漠平

賜牧阿爾察圖和岳爾敖拉雅蘇圖鄂和多爾訥默格爾
諸界雍正五年以病罷子彌育特多爾濟襲

一次襲彌育特多爾濟烏爾占長子雍正五年襲
扎薩克一等台吉乾隆十三年卒子根敦車琳襲
二次襲根敦車琳彌育特多爾濟長子乾隆十三

年襲扎薩克一等台吉三十五年卒子烏巴什襲
三次襲烏巴什根敦車琳長子乾隆三十五年襲
扎薩克一等台吉四十六年

詔世襲罔替

附 輔國公衮布扎布列傳

衮布扎布扎薩克台吉烏爾占從弟父諾爾布
號額爾德尼琿台吉子一即衮布扎布康熙二十
九年來朝授二等台吉附烏爾占旗三十五年隨

大軍敗噶爾丹於昭莫多五十六年駐防阿爾台

軍營

詔授一等台吉雍正二年

諭曰衮布扎布曾從征昭莫多此次大兵駐阿爾台伊不

論班期久駐軍營督辦購馬事宜復隨大軍三擊賊衆

甚屬奮勉著授輔國公是年卒子沙克都爾扎布襲

一次襲沙克都爾扎布衮布扎布長子雍正二年

襲輔國公八年卒無嗣弟巴勒桑襲

二次襲巴勒桑衮布扎布次子雍正八年襲輔國公乾隆三十六年卒子錫喇布多爾濟襲

三次襲錫喇布多爾濟巴勒桑長子乾隆三十六年襲輔國公四十二年卒子納木扎勒多爾濟襲四次襲納木扎勒多爾濟錫喇布多爾濟次子乾隆四十二年襲輔國公四十六年

諭曰納木扎勒多爾濟所襲輔國公爵因其祖衮布扎布効力軍營所封著加恩世襲罔替

扎薩克一等台吉哈瑪爾岱青列傳

哈瑪爾岱青喀爾喀部人姓博爾濟吉特郡王朋
素克喇布坦從弟祖固魯諾木齊為車臣濟農崆
奎第三子生子博托果號額爾克諾顏子一即哈
瑪爾岱青初授二等台吉康熙三十四年大軍將
進勦噶爾丹哈瑪爾岱青請往偵

許之三十五年隨前鋒侍衛阿南達至汗阿林擊固英必
齊葉齊等賊百餘盡降之偵噶爾丹遁率屬五十

赴昆都倫額濟內河分路追緝尋引兵五百防噶
斯口三十六年朔漠平敘功

詔授扎薩克一等台吉四十二年

上幸西安府哈瑪爾岱青來朝會大閱扈

駕預觀奏言軍容之盛目所未覩因

賜宴遣歸五十三年卒子鄂木布濟襲

一次襲鄂木布濟哈瑪爾岱青長子康熙五十三年襲扎薩克一等台吉五十五年率兵駐防扎布

堪尋赴散秩大臣祁里德軍聽調五十六年大軍
由布拉罕布魯勒分路進勦準噶爾鄂木布濟奉
檄赴哈達青吉勒護軍牧偵特楞古特降衆叛率
兵二百立木柵於阿爾台防賊逸五十七年率兵
千餘駐呼勒瑪諾爾五十八年移駐布拉罕蘇伯
尋由阿濟督解巴里坤軍需五十九年率兵二百
至察罕呼濟爾偵賊踪由伊彌勒河沙喇呼魯蘇
擒厄魯特逃衆還駐布拉罕蘇伯六十年春駐拜

達哩克夏解送軍駝冬駐塔爾弼六十一年由奈
曼明安督解軍需雍正二年仍駐塔爾弼八年移
駐蘇伯和寧烏蘇九年隨副都統阿三等率兵二
千赴庫卜克爾防禦準噶爾會賊入阿濟鄂木布
濟棄汎私歸靖邊大將軍順承親王錫保劾請削
職治罪

詔來京面詢降旨尋以輔國公通謨克游牧被掠
遣官移之阿拉善

詔察閱鄂木布濟等牧地

頒給糧茶尋請移居阿拉善附近之綽確地

許之十年三月八

覲

諭曰鄂木布濟棄汎私歸固有應得之罪但念為賊阻截不能通信回守游牧使賊秋毫無犯情尚可矜且人材亦甚出衆著加恩免其削職即隨郡王格埒克延丕勒統率所屬兵丁赴伯格爾建勲將軍達爾濟軍營効力

贖罪是年隨格埒克延丕勒追擊準噶爾有功會同部
扎薩克喇布坦坐烏遜珠勒退縮罪削職

詔撤其屬十五戶

賜鄂木布濟轄之尋移木奇齊格訥洪果爾阿齊喇克十
一年偕前鋒統領塔爾瑪善擒獲準噶爾賊衆

賜孔雀翎十三年駐防偉歡塔勒滿乾隆十五年以病罷
子達爾巴圖襲

二次襲達爾巴圖鄂木布濟長子乾隆十五年襲

扎薩克一等台吉十九年解送烏爾袞塔密爾城
所貯軍械赴烏里雅蘇台二十一年和託輝特逆
賊青衮咱卜叛煽衆喀爾喀達爾巴圖督兵防汛
獎賜孔雀翎三十五年以病罷子達什琳沁襲

三次襲達什琳沁達爾巴圖長子乾隆三十五年
襲扎薩克一等台吉四十六年

詔世襲罔替

欽定外藩蒙古回部王公表傳卷之六十六

欽定四庫全書

欽定外藩蒙古回部王公表傳卷之六十七

傳第五十一

扎薩克一等台吉納瑪琳藏布列傳

納瑪琳藏布喀爾喀部人姓博爾濟吉特貝勒博
貝從子祖羅卜藏台吉額琳沁以戕扎薩克圖汗
旺舒克奔厄魯特嗣與噶爾丹隙避居西藏依達
賴喇嘛康熙三十一年來歸由西寧入

覲

上以其舊為扎薩克

詔封輔國公駐牧歸化城三十五年隨勒噶爾丹卒於軍
有子三長鄂爾齊圖哈坦巴圖爾次拉哩次衮布
車稜皆留西藏至是

召來京鄂爾齊圖哈坦巴圖爾以疾廢停襲子二長納瑪
琳藏布次扎木揚四十八年

諭曰和託輝特貝勒博貝與厄魯特接壤防守不可不嚴

念伊力孤必得族中兄弟助之方克有濟納瑪琳藏布
本和託輝特人著授扎薩克一等台吉與博貝同居尋
賜牧塔斯郭勒克木克木齊克地五十七年卒弟扎木揚

襲

一次襲扎木揚納瑪琳藏布弟康熙五十七年襲
扎薩克一等台吉雍正二年卒無嗣

詔其叔父袞布車稜襲

二次襲袞布車稜額琳沁第三子雍正二年襲扎

薩克一等台吉十年準噶爾賊掠杭愛山衮布車
稜被執遂遇害

詔其兄拉哩襲

三次襲拉哩額琳沁次子雍正十年襲扎薩克一
等台吉

命移牧拜幹偉歡塔勒滿訥穆爾格庫都爾格烏克爾等
處乾隆二年卒子班第襲

四次襲班第拉哩長子乾隆二年襲扎薩克一等

台吉二十一年卒子三都布多爾濟襲

五次襲三都布多爾濟班第長子乾隆二十一年襲扎薩克一等台吉四十六年

詔世襲罔替

扎薩克一等台吉伊達木扎布列傳

伊達木扎布喀爾喀部人姓博爾濟吉特輔國公
衮占長子初授協理台吉康熙五十六年隨同部
輔國公博貝由布魯勒路擒厄魯特宰桑羅卜藏

錫喇布五十九年擒宰桑貝坤皆有功雍正三年
烏梁海人和羅爾邁叛逃伊達木扎布會博貝軍
擒斬賊衆四年博貝上其功

詔授扎薩克一等台吉乾隆六年叅贊大臣慶泰奉

命赴哈里勒邁閱防秋兵以伊達木扎布旗軍容整獎
賚之七年卒子根敦襲

一次襲根敦伊達木扎布第三子初授協理台吉
雍正九年厄魯特貝勒色布騰旺布屬奇爾吉斯

人糾衆叛有車木楚克納木扎勒者土謝圖汗部
貝勒也率兵赴察罕度爾軍經其地猝被害根敦
聞之引五十騎往追斬級十一餘衆遁乾隆七年
襲扎薩克一等台吉尋駐防塔密爾十九年移駐
哈喇阿濟爾罕二十年三月大軍進勦達瓦齊烏
里雅蘇台辦事大臣哈達哈檄根敦選兵五百分
巡海喇圖庫列圖哈道里科布多布延圖等處與
駐防烏哈爾和碩之公品級諾爾布扎布互為聲

援八月包沁賊阿克珠勒台拉克等叛應阿睦爾
撤納鄂爾格諾爾納琳哈喇諸汛皆被掠根敦偕
土謝圖汗部扎薩克台吉齊巴克扎布往捕路遇和
託輝特青衮咱卜赴汗哈屯收撫烏梁海與合兵
復會自軍營旋之車臣汗部郡王巴雅爾什第等
同至布拉罕擒阿克珠勒俘其衆二十一年隨定
邊左副將軍哈達哈征哈薩克偵劫驛賊奇齊爾
吉斯宰桑固爾班和卓等攜衆千餘遁烏梁海因

率索倫兵邀擒之事

聞

賜孔雀翎尋擊哈薩克衆於巴顏山軍旋請從勦逆賊
青衮咱卜聞就擒乃還二十二年

詔偕叅贊大臣唐喀祿護侍衛松達納赴哈薩克二十
三年定邊左副將軍親王成衮扎布劾根敦緝盜
馬賊弗獲

詔奪俸二十八年卒子車都布多爾濟襲

二次襲車都布多爾濟根敦長子初授三等台吉
乾隆十七年駐防喀喇烏蘇十八年杜爾伯特台
吉車凌等來降車都布多爾濟兵迎之擒擅入汎界
之扎哈沁宰桑禡木特二十年隨大軍勦達瓦齊
旋赴汗哈屯收撫烏梁海謀逆賊阿睦爾撒納叛
偕賽因諾顏部貝勒車布登扎布由哈薩克圖追
緝之二十一年從父根敦追擒固爾班和卓叙功
詔授一等台吉

賜佩飾復隨車布登扎布捕烏梁海逃賊郭勒卓輝及
和託輝特逆賊青衮咱卜二十四年以薩拉布拉
克汎馬為嗎哈沁所竊隨賽因諾顏部貝子額爾
克沙喇往捕之

賜孔雀翎尋隨杜爾伯特郡王車凌烏巴什等追勦烏
梁海宰桑庫克辛盡降其衆

詔嘉之

命乾清門行走先是烏梁海人郭木薩噶以擅殺懼罪

遁俄羅斯車都布多爾濟追至和寧嶺縛之獻至
是并

賚幣賜獎二十八年襲扎薩克一等台吉尋防護杜爾
伯特游牧三十八年卒子巴圖爾襲

三次襲巴圖爾車都布多爾濟次子乾隆二十八
年襲扎薩克一等台吉四十六年

詔世襲罔替

扎薩克一等台吉達什朋素克列傳

達什朋素克喀爾喀部人姓博爾濟吉特貝勒博
貝從子父圖巴初以避噶爾丹亂奔居青海後來
歸隨博貝由布魯勒進勦準噶爾有功授一等台
吉

賜冠服嗣土謝圖汗部貝勒丹津多爾濟奉

詔赴巴里坤圖巴以兵從軍旋

詔封輔國公

賜雙眼孔雀翎尋赴察罕度爾以克爾森齊老援勦不力

私歸游牧罪

詔削爵留軍効力未幾復授一等台吉卒子一即達什朋
素克雍正二年隨博貝駐特斯防護烏梁海三年
追擒烏梁海叛人和羅爾邁九年從勦準噶爾於
蘇克阿勒達呼十二年額駙親王策凌薦其才

詔授二等台吉乾隆十八年隨叅贊大臣薩拉爾擒私入
科布多汛之烏梁海人扎木闡等

獎賚幣尋偕賽因諾顏部貝勒沙克都爾扎布等招降

扎哈沁宰桑馮木特屬二十一年偵和託輝特逆賊青衮咱卜叛馳報烏里雅蘇台軍令之備二十二年敘功授一等台吉尋析青衮咱卜屬

命轄之授扎薩克二十三年以烏梁海賊阿木古朗等劫馬達什朋素克護所屬叅贊大臣福祿劾之

詔削扎薩克留軍効力尋隨福祿追擒阿木古朗等置於法

詔宥前罪仍授扎薩克四十四年卒子衮布扎布襲

一次襲衮布扎布達什朋素克長子乾隆四十四年襲扎薩克一等台吉扈

駕木蘭行圍

賜孔雀翎四十六年

詔世襲罔替

扎薩克一等台吉普爾普車稜列傳

普爾普車稜喀爾喀部人姓博爾濟吉特輔國公通謨克從子祖巴克蘇木當噶爾丹掠所部時避

居特穆爾圖諾爾鄰伊犁以力弱不獲歸子孫遂
為準噶爾部人乾隆二十年大軍勦達瓦齊伊犁
定普爾普車稜攜族來歸

詔編所屬百餘丁為一佐領令轄之授扎薩克一等台
吉以通謨克子輔國公旺沁扎布為其戚族

命往同居即令旺沁扎布護視之二十四年卒無嗣其
母車稜請以旺沁扎布第三子沙克都爾扎布為
普爾普車稜嗣襲其職

允之

一次襲沙克都爾扎布普爾普車稜嗣子乾隆二

十四年襲扎薩克一等台吉先是

上以普爾普車稜屬習處準噶爾不諳喀爾喀業雖編
佐領不列盟二十七年定邊左副將軍親王成袞
扎布奏漸與喀爾喀衆習

詔隸扎克畢賴色欽畢都哩雅諾爾盟二十九年沙克
都爾扎布卒亦無嗣復

允車校請以旺沁扎布第四子尼木布多爾濟襲

二次襲尼木布多爾濟沙克都爾扎布弟乾隆二

十九年襲扎薩克一等台吉四十六年

詔世襲罔替

欽定外藩蒙古回部王公表傳卷之六十七

欽定四庫全書

欽定外藩蒙古回部王公表傳卷之六十八

傳第五十二

扎薩克一等台吉諾爾布列傳

諾爾布喀爾喀部人姓博爾濟吉特扎薩克圖汗
格埒克延丕勒族弟其五世祖鍾圖岱號巴圖爾
有子丹巴號昆都倫陀音為喀爾喀八扎薩克之
一子七長色稜阿海嗣扎薩克生子二長喇嘛扎

布子策登扎布以附逆賊青衮咱卜叛誅不列傳
次肅哩子納木扎勒多爾濟即諾爾布父初色稜
阿海居薩爾塔郭勒以時入貢最恭順康熙二十
一年

遣侍衛拜音察克等往賚冠服佩帶弓刀器幣二十五年
赴庫掄伯勒齊爾盟二十七年偕弟諾顏圖克圖噶
爾旦畢哩克圖色埒什希溫布達什額琳臣等來
歸三十年迎

覲多倫諾爾

詔封扎薩克多羅郡王三十一年

詔發粟賑所屬貧戶三十九年卒喇嘛扎布降襲扎薩克

多羅貝勒五十八年來朝雍正九年喇嘛扎布卒

策登扎布襲乾隆八年授所部副將軍二十年以

疾罷副將軍仍

命督理驛務二十一年和託輝特逆賊青衮咱卜叛策

登扎布棄汛歸由布延圖布拉克徙牧布克迎附

青衮咱卜時諾爾布為二等台吉諫沮之弗聽諾
爾布偕台吉固穆扎卜阿喇布坦拉旺布旌旺兌
楚魯木等馳赴烏里雅蘇台軍訴世受

國恩誓不從賊因率屬由博羅哈卜齊爾赴察罕託
輝游牧且請以所攜駝馬助呼濟爾圖阿穆托克
蔡諸汎兵策登扎布伏誅定邊左副將軍親王成
衮扎布請以諾爾布領其衆

允之

詔授扎薩克一等台吉二十二年駐防布延圖額德格
特汎二十七年解軍馳赴伊犁三十一年送馬四
千赴烏魯木齊三十二年卒子敦多布多爾濟襲
一次襲敦多布多爾濟諾爾布長子乾隆三十二
年襲扎薩克一等台吉四十六年

詔世襲罔替

厄魯特一等台吉噶爾丹達爾扎列傳

今授扎薩克

噶爾丹達爾扎厄魯特人輝特族姓伊克明安父

羅卜藏初為準噶爾台吉以噶爾丹虐所部棄之
從和碩特台吉噶爾璽多爾濟來歸

詔附阿拉善厄魯特牧噶爾丹為大軍所敗尋自殺從子
丹濟拉竄走羅卜藏偕噶爾璽多爾濟從副都統
阿南達設哨布隆吉爾及噶斯口防緝之噶爾璽
多爾濟叛逃羅卜藏不從率屬八百餘歸阿拉善
牧敘功封輔國公尋徙居喀爾喀與扎薩克圖汗
部輔國公通謨克等鄰牧羅卜藏卒

詔以其長子巴濟襲輔國公爵授扎薩克領部衆巴濟弟
曰扎木畢曰阿海曰達什達爾扎曰噶爾丹達爾
扎皆隸之巴濟始稍自奮嘗從靖逆將軍富寧安
駐防巴里坤獻羊千馬八百糧百餘石助軍襲擊
準噶爾于伊勒布爾和碩阿克塔斯烏魯木齊諸
境以吐魯番回目扎克扎禡木特內附率兵五百
往護敗準噶爾賊衆偵青海羅卜藏丹津叛復偕
副都統阿喇納馳赴布隆吉爾擊之

諭嘉獎扎木畢赴烏魯木齊擊準噶爾賊還遇伏於畢留

圖戰死

詔由三等台吉追封輔國公無嗣以達什達爾扎襲阿海
偕喀爾喀公通謨克勒羅卜藏丹津獲逆黨丹津
以獻

詔由三等台吉晉一等台吉有濟克濟扎布者巴濟戚族
也游牧青海以羅卜藏丹津亂挈衆就巴濟牲畜
多道斃

詔所司議恤編佐領附巴濟牧雍正九年巴濟叛附準噶爾時準噶爾台吉噶爾丹策凌謀煽內附諸厄魯特遣將大策凌敦多卜逾阿濟嶺至伯格爾察罕額爾克誘巴濟及駐牧推河之厄魯特輔國公茂海台吉車稜等往會達什達爾扎濟克濟扎布及協理台吉朋素克岱青等皆從叛復導賊掠喀爾喀牧噶爾丹達爾扎幼巴濟攜赴準噶爾其族屬未附逆者偕喀爾喀公通謨克等徙訥穆勒圖喀

喇博囉等處靖邊大將軍傅爾丹以所部徙牧告
諭總督查郎阿察置之十年甘肅巡撫許容疏言鎮夷口

內紅布潮地巴濟屬列模居稱避準噶爾將內徙
巴濟已叛歸準噶爾所部雖稱避賊豈可令居內
地督臣查郎阿以巴濟屬佐領翁鄂柴等徙綽確
哈魯爾給糧茶將偕喀爾喀公通謨克等徙牧阿
拉善後臣思寧夏地衍僅隔一阿拉善別無險要
鎮番孤懸塞外恐厄魯特逼處人心難測請

飭令密防未奉

旨內入者毋縱入汛

詔檄查郎阿等酌徙巴濟屬未附逆者屯汛嚴轄會準噶

爾小策凌敦多卜以兵三萬至阿爾台巴濟及達
什達爾扎朋素克岱青茂海車稜等從且稱喀爾
喀兵弱將導準噶爾越察罕廈爾掠諸扎薩克游
牧我軍偵以

聞

諭曰巴濟等有負國恩罪當誅戮伊等不以降賊為恥反
代為賊謀喀爾喀聞之自必痛心切齒奮勇爭先矣喀
爾喀親王額駙策凌等果大敗準噶爾賊于克爾
森齊老及額爾德尼昭巴濟遁歸偕茂海車稜等
各以其族游牧特穆爾圖諾爾為準噶爾屬乾隆
二十年大軍征達瓦齊抵伊犁時巴濟及茂海車
稜等皆前死噶爾丹達爾扎偕達什達爾扎濟克
濟扎布及茂海車稜子迎降

諭曰叛賊子弟理應治罪但伊等父兄俱已死亡姑從寬免伊等由喀爾喀叛逃今應仍令游牧喀爾喀所但所屬戶口甚多著於伊等台吉內令大者准攜三十戶次二十次十戶餘俟事竣酌量安置諸台吉仍導令入覲有達瓦者準噶爾之扈魯禡台吉也游牧額琳哈畢爾噶阿睦爾撒納叛附之以兵襲噶爾丹達爾扎等於其境大軍至乞降乃遣屬護至尋由軍營入

覲

諭曰噶爾丹達爾扎初隨巴濟茂海車稜等叛逆今觀
之人尚樸誠著授為一等台吉遣歸喀爾喀牧二十

一年六月

上憫其甫至牧乏生計

詔給口糧兩月十一月喀爾喀親王成衮扎布請給續

至者口糧

諭曰噶爾丹達爾扎屬前雖給賜口糧目今未能充裕

著將新至戶口及前已經賞給口糧人等再給口糧
兩月以示體恤二十二年

詔給穀種復以牧地寒早霜

諭遺之薊麥三十年噶爾丹達爾扎卒子拉克沁噶喇
襲

一次襲拉克沁噶喇噶爾丹達爾扎長子乾隆三
十年襲一等台吉

詔授扎薩克給印編佐領一隸喀爾喀扎薩克圖汗部

以扎克畢賴色欽畢都哩雅諾爾盟長轄之四十
六年卒子薩木丕勒諾爾布襲

二次襲薩木丕勒諾爾布拉克沁噶喇長子乾隆
四十六年襲扎薩克一等台吉

詔世襲罔替

欽定外藩蒙古回部王公表傳卷之六十八

欽定四庫全書

史部

欽定外藩蒙古回部王公表傳卷六十九至七十二

主事_臣陳若霖覆校

總校官編修_臣倉聖脉

欽定四庫全書

欽定外藩蒙古回部王公表傳卷之六十九

傳第五十三

喀爾喀賽因諾顏部總傳

賽因諾顏部稱喀爾喀中路至

京師三十餘里東界博囉布爾哈蘇多歡西界庫勒

薩雅索郭圖額金嶺南界齊齊爾里克北界齊老

圖河元太祖十七世孫偉徵諾顏諾諾和有子五

長阿巴岱次阿布和為土謝圖汗部祖次塔爾呢
無嗣次圖蒙肯次巴賚今賽因諾顏部二十四札
薩克自厄魯特二旗外皆其裔圖蒙肯子十三長
卓特巴號車臣諾顏為札薩克輔國公託多額爾
德尼諾爾布札布台吉圖巴三旗祖次丹津喇嘛
號諾們汗為札薩克親王善巴輔國公旺舒克車
稜達什台吉齊旺多爾濟素達尼多爾濟六旗祖
次車稜次羅雅克皆無嗣次濟雅克號偉徵諾顏

為扎薩克輔國公阿玉什一旗祖次扎木本其裔
不列扎薩克次察斯喜布號昆都稜為扎薩克台
吉伊達木納木扎勒二旗祖次丹津號班珠爾為
扎薩克超勇親王策凌子親王成袞扎布郡王車
布登扎布二旗祖次畢瑪里吉哩諦號巴圖爾額
爾德尼諾顏為扎薩克台吉丹津額爾德尼一
旗祖次錫納喇克薩特號琿台吉為扎薩克台吉
阿里雅薩木濟特二旗祖次桑噶爾扎號伊勒登

和碩齊為扎薩克台吉沙嚕伊爾都齊一旗祖次
扣肯號巴扎爾為扎薩克台吉濟納彌達一旗
祖次袞布號昆都倫博碩克圖授扎薩克郡王今
襲貝勒其曾孫額墨根授扎薩克台吉又自為一
旗巴賚子一曰噶爾瑪為扎薩克輔國公素泰伊
勒登一旗祖初喀爾喀有所謂紅教者與黃教爭
圖蒙肯尊黃教為之護持唐古特達賴喇嘛賢之
授賽因諾顏號令所部奉之視三汗圖蒙肯卒次

子丹津喇嘛復受諾們汗號于達賴喇嘛崇德三年遣使通貢

優賚遣歸五年

賜敕獎諭順治四年以偕其族土謝圖汗衮布等合兵援

蘇尼特部叛人騰機思

詰責之七年遣子額爾德尼諾木齊上書乞好

詔偕衮布約誓定議十一年額爾德尼諾木齊復奉表至諭曰爾奏言喀爾喀左翼四旗皆爾統攝凡有敕諭罔弗

遵行今即如所請可速飭兩部長遣子來朝有不遵者
即行奏聞十二年偕袞布等各遣子弟來朝

詔宥前罪尋設八札薩克

命丹津喇嘛領左翼札薩克之一歲貢九白如三汗例十

八年

賜遵文順義號給之印康熙三年

詔所屬毋越界游牧丹津喇嘛卒子塔斯希布襲塔斯希

布卒子善巴襲

賜信順額爾克岱青號二十七年噶爾丹掠喀爾喀善巴
率族屬來歸

詔附牧烏喇特諸部界三十年

駕幸多倫諾爾會閱

詔封善巴等王台吉有差各授扎薩克編所屬佐領隸土
謝圖汗部三十一年善巴從弟策凌來歸策凌者
圖蒙肯第八子丹津之孫台吉納木扎勒之子後
授固倫額駙和碩超勇親王定邊左副將軍兼稱

喀爾喀大扎薩克者也三十六年

詔善巴等各歸舊牧五十六年選兵赴阿爾台軍偵禦策

妄阿喇布坦雍正三年

上以所部系出賽因諾顏較三汗裔繁衍而額駙策凌自

簡任副將軍勞績懋著

命率近族親王達什敦多布貝勒納木札勒齊素龍貝子

策旺諾爾布輔國公阿努哩敦多布額琳沁札木

禪旺扎勒台吉格木丕勒齊旺錫喇扎布達爾濟

雅根敦車布登巴朗延達博第呢瑪特克什諾爾
布扎布凡十九扎薩克別為一部以其祖賽因諾
顏號冠之稱喀爾喀中路不復隸土謝圖汗喀爾
喀有四部自此始九年所部兵隨大軍勦噶爾丹策
凌擊其衆於克爾森齊老及額爾德尼昭大敗之
十三年撤還乾隆元年選兵赴鄂爾坤防秋六年
命叅贊大臣副都統慶泰察閱防秋兵于桑錦托羅海
十三年選駝五百運歸化城米赴塔密爾軍營尋

調所部兵二千駐防錫喇烏蘇十八年分駐扎布
堪二十年隨大軍勦達瓦齊先是喀爾喀分設中
路時但以賽因諾顏名其部以示別于三汗未議
襲號三十一年親王成衮扎布奏所部來歸初親
王善巴為同族長又世掌丹津喇嘛所遺印請視
三汗例以善巴曾孫親王諾爾布扎布襲賽因諾
顏號

詔允其請俾與土謝圖汗車臣汗扎薩克圖汗均世襲

罔替初所部十九旗後增三旗附厄魯特二旗扎
薩克二十有四盟于齊齊爾里克設正副盟長各
一副將軍叅贊各一爵三十有三扎薩克和碩親
王二附固山貝子一由貝勒降襲鎮國公一由貝
子降襲輔國公二公品級一等台吉一公品級三
等台吉一扎薩克多羅郡王二一由鎮國公晉封
扎薩克多羅貝勒二一由郡王降襲一由鎮國公
晉襲扎薩克鎮國公一由扎薩克台吉晉襲附輔

國公一扎薩克輔國公五一由扎薩克台吉晉襲
公品級扎薩克一等台吉一扎薩克一等台吉九
附輔國公一公品級三等台吉一厄魯特扎薩克
固山貝子二一由郡王降襲一由輔國公晉襲

扎薩克和碩親王善巴列傳

今兼襲賽
因諾顏號

善巴喀爾喀部人姓博爾濟吉特元太祖裔格呼
森扎扎賚爾琿台吉之六世孫其曾祖圖蒙肯始
號賽因諾顏與三汗並稱次子丹津喇嘛居翁吉

河霍岳爾客為喀爾喀八扎薩克之一有子四長
塔斯希布號伊勒登都爾格齊即善巴父次色爾
濟穆次素達尼次瑪哈達瓦其裔皆別設扎薩克
詳各傳康熙六年善巴嗣扎薩克遣使告

賜信順額爾克岱青號二十一年

命副都統班達爾什等往賚冠服佩帶刀弓器幣二十二
年遣使謝先是都統畢哩克圖奉

命勘喀爾喀與內扎薩克遊牧以噶爾拜瀚海為界久之

多越界互竊議置哨至是善巴以蒙古舊俗逐水草居疏乞免

諭識舊界毋越二十五年以土謝圖汗察琿多爾濟與扎薩克圖汗成衮構釁

詔善巴導之修好二十七年噶爾丹掠所部善巴以兵助察琿多爾濟禦之鄂羅會諾爾不敵兵潰攜孥來歸

賜居烏喇特界外和勒博津其偕至之伊勒登楚琥爾烏

巴什居烏蘭布拉克諾木齊岱青居都什喀喇庫
蘭居奧吉碩龍本札勒墨爾根居茂金口阿玉什
額爾克阿海居蘇巴爾罕阿喇布坦岱青阿海居
楚布魯洪郭爾烏巴什居喀喇和碩皆附烏喇特
界二十八年十月授扎薩克

詔隸內扎薩克之喀爾喀右翼親王諾內往示內地法度
并

遣官發殺虎口倉粟贍其衆十二月善巴等請赴寧夏互

市

許之三十年迎

覲多倫諾爾

詔封多羅郡王仍兼扎薩克同族盡隸之尋選兵隨侍郎

瓦岱赴圖拉河偵噶爾丹是年冬以厄魯特巴圖

爾額爾克濟農和囉理既降復遁

詔偕同族輔國公託多額爾德尼台吉丹津額爾德尼圖

巴等備兵防禦尋和囉理乞降罷兵三十一年五

月復

發殺虎口倉粟賑所屬貧戶六月

諭緝叛賊伊拉古克三呼圖克圖三十四年噶爾丹掠巴

顏烏蘭善巴遵

旨移牧內汛以族子輔國公旺舒克屬畢托達等由庫塞

訥塔爾納遁赴噶爾丹遣德都赫沙津擒之收其

戶畜還三十五年五月偕同族郡王衮布等隨西

路大軍進勦噶爾丹於昭莫多降其衆五百五十

九先是善巴遣屬扎勒等赴庫倫伯勒齊爾傾賊
踪比還報噶爾丹黨博羅特和卓潛入界善巴捕
獲之奏噶爾丹若久居巴顏烏蘭必窺塞肆掠請
敕大軍速剿

上韙其言及大軍行

諭所屬選兵千善巴增選千五百赴調以健馬給官兵且
獻羊助食軍旋

諭曰善巴肫誠効力懋著勤勞著晉封和碩親王仍留信

順舊號以示優眷尋

命察所屬喇嘛之交通噶爾丹者收其書以獻八月大將
軍費揚古奉

命由科圖至塔密爾移駐鄂羅會諾爾檄善巴遣兵沿邊
傾禦有台吉丹濟拉者噶爾丹從子也不知我師
再出謀掠善巴牧善巴謀報費揚古擊敗之十一
月丹濟拉遣其黨格壘沽英乞降善巴長史伊布
根齎疏

聞

詔侍郎滿丕往受之仍偕善巴協力防賊三十六年善巴

請從軍

許之尋噶爾丹竄死朔漠平

遣歸游牧三十七年移牧瀚海

命設汛防守四十六年卒子二長達什敦多布襲親王爵

次車稜達什封扎薩克輔國公別有傳

一次襲達什敦多布善巴長子康熙四十六年襲

扎薩克和碩親王尋授盟長雍正四年因老乞休
許之子二長喇嘛扎布次德沁扎布相繼襲

二次襲喇嘛扎布達什敦多布長子雍正四年襲
扎薩克和碩親王九年噶爾丹策凌謀誘衆喀爾
喀貽書喇嘛扎布額駙郡王策凌獲之獻

詔宣諭衆喀爾喀母惑十年大軍擊賊酋策凌敦多卜於
克爾森齊老喇嘛扎布棄軍歸收議削爵論死

諭曰喇嘛扎布怯懦無恥理應照議論死但念伊祖善巴

當喀爾喀未定之先輸誠內附屢隨大軍奮勉効力朕實不忍予以顯戮著削爵免死永遠監禁所遺扎薩克原爵以其弟德沁扎布襲撤還一佐領給額駙策凌

三次襲德沁扎布達什敦多布次子雍正十一年襲扎薩克和碩親王乾隆十六年授所部副將軍尋授副盟長十七年偕土謝圖汗部郡王齊巴克雅喇木丕勒率兵千駐防錫喇烏蘇十八年獻駝馬助軍得紀錄十九年正月赴烏里雅蘇台汎駐

防七月輝特台吉阿睦爾撒納來降

詔偕叅贊大臣努三移所携降衆於塔密爾尋偕副都
統納木扎爾由塔密爾移置固爾班舒魯克設汎
防護二十一年六月督理軍營駝馬七月授叅贊
大臣未幾和託輝特之逆賊青衮咱卜叛布偽檄
撤喀爾喀各汎兵土謝圖汗部扎薩克台吉遜篤
布車臣汗部扎薩克台吉成衮扎布覺其偽以檄
由德沁扎布所至疑與青衮咱卜通以

聞

諭曰偽檄流傳或係他人假冒德沁扎布之名亦未可
定著加恩免究飭令速歸舊汛接理驛務毋自貽悞
會所屬復乘間劫馬為土謝圖汗部貝勒達什丕
勒所訐

詔速擒賊贖罪九月

諭曰朕聞德沁扎布與親王成袞扎布甫聞逆賊背叛
之信檄調衆扎薩克兵丁復令哲卜尊丹巴呼圖克

圖徧行曉諭以安衆心抒誠効力甚屬可嘉著交理藩院議敘是年冬青衮咱卜就擒德沁扎布解叅贊大臣職二十二年正月大軍由巴里坤勦厄魯特餘賊

詔購馬解軍十一月

上念其諳練老成復授叅贊大臣赴巴里坤協理軍務二十三年緝獲盜馬賊瑪塔克加級

賚幣二十七年卒子三長諾爾布扎布襲親王爵次齊

旺多爾濟授貝子品級扎薩克台吉次三丕勒多
爾濟授公品級三等台吉別有傳

四次襲諾爾布扎布德沁扎布長子初由一等台
吉晉封固山貝子互見彼傳乾隆二十七年襲扎
薩克和碩親王尋授副盟長

命乾清門行走

賜三眼孔雀翎三十一年追襲其祖圖蒙肯所遺賽因
諾顏號

賜之印詳總傳是年授所部副將軍四十六年

諭曰諾爾布扎布所襲親王係其曾祖善巴來歸後從
征噶爾丹有功由郡王晉封之爵賽因諾顏又係伊
部舊號著加恩均予世襲罔替

附

固山貝子諾爾布扎布列傳

今襲鎮國公

諾爾布扎布親王德沁扎布長子初授一等台吉
乾隆十七年

賜公品級二十年三月大軍勦達瓦齊烏里雅蘇台大

臣哈達哈檄以兵五百屯烏哈爾和碩防烏梁海
并收準噶爾降衆九月敘追勦包沁叛賊台拉克
和濟木呼哩功

詔封固山貝子二十一年以由軍汎私歸

飭偕扎薩克圖汗部公品級多岳特効力贖罪尋以督
理驛務

諭獎之二十二年獻馬助軍得紀錄尋

賜雙眼孔雀翎二十七年襲扎薩克親王互見彼傳其

所遺貝子爵

詔改鎮國公以子車登扎布襲

一次襲車登扎布諾爾布扎布長子乾隆二十七年襲鎮國公四十六年

諭曰車登扎布父親王諾爾布扎布未襲親王時曾賜公品級因追勦包沁有功特封貝子朕念此爵係伊本身効力所得是以于伊既襲親王之後仍令車登扎布襲鎮國公著加恩世襲罔替

附 公品級三等台吉三丕勒多爾濟列傳

三丕勒多爾濟親王德沁扎布第三子初授三等台吉乾隆二十二年德沁扎布獻馬助軍

諭議敘尋議親王爵無可加應於伊子內選一人賞公品級德沁扎布因以三丕勒多爾濟請

許之四十六年理藩院議三丕勒多爾濟所授公品級例弗應世襲俟出缺時請

旨

詔如議

欽定外藩蒙古回部王公表傳卷之六十九